

## U Tuzli predstavljeni rezultati projekta pametnih škola



Bosnu i Hercegovinu i Hrvatsku u posljednjih godinu dana povezoao je projekt "Inovativnim umom do pametnih škola" koji je doprinjeo razvoju obnovljivih izvora energije, ali i obnovi šest škola u Tuzlanskom kantonu i jedne škole u Slavonskom Brodu koje su postale energetske efikasne te se u njih upisuje sve više djece.

– Ovaj projekt doprinio je da danas imamo strukture ljudi, energetskih menadžera koji će na racionalan način upravljati energijom. Također dobili smo sjajne efekte u smislu ušteda koje se mogu iskoristiti za aktivnosti koje školama zaista trebaju – rekao je projekt menadžer u Centru za razvoj i podršku Tuzla Edin Zahirović tokom završnog foruma projekta Pametne škole "Energijska efikasnost- ulaganja i dobiti".

U obnovljenim školama, pored finansijskih i ušteda u potrošnji energije, poboljšani su uslovi rada i boravka djece u školama.

-Učenici više ne moraju biti obučeni u jakne, ne moraju nositi rukavice u školi što je već prošle zime bila njihova svakodnevnica. Sada imaju potpuno normalne uslove rada. Sigurnije je i zdravije boraviti u ovakvoj sredini – istaknuo je Adi Tanović iz Centra za razvoj i podršku.

Srednjoškolci su tokom projekta zajedno sa svojim mentorima stvarali mnoge inovacije. Održano je takmičenje škola u štednji energije u kojem je učestvovalo 105 škola iz TK i Brodsko Posavske županije. Educirana su 42 uposlenika u oblasti energetskog menadžmenta i podržano 19 mladih inovatora iz oblasti primjene obnovljivih izvora energije.

Učenik Gimnazije Živinice Salko Užičanin pobjednik je takvog jednog takmičenja koje je održano u Slavinskom Brodu.

– Ovaj projekt je imao izuzetan utjecaj na moje shvaćanje svijeta. Mnogo sam se edukovao o obnovljivim izvorima energije. Moja vizija svijeta sada je potpuno drugačija, odnosno poprimila je ljepše obličje. Imam nadu u svijet bez prljavih izvora energije, bez zagađenja i sa što manje klimatskih promjena – rekao je Užičanin.

Jedna od najvećih vrijednosti projekta, kažu njegovi realizatori iz Centra za razvoj i podršku, jeste upravo u tome što su obnove škola povezale Bosnu i Hercegovinu i Hrvatsku.

– U ovom projektu susrelo se 40.000 ljudi, najveći broj tih ljudi su mladi, gimnazijalci, srednjoškolci i njihovi roditelji. Zapamtite, to je 40.000 ljudi na kojima počiva budućnost – istaknuo je Osman Puškar, ministar razvoja i poduzetništva u Vladi Tuzlanskog kantona, koja je također uz Europsku uniju jedan od nositelja projekta.

Iz Brodsko-Posavske županije iz Republike Hrvatske smatraju da je ovaj projekt pokazao važnost školskog sistema koji izgrađuje mostove među zemljama regije.

– Najvažniji je spoj znanja, ali i stvaranje novih prijateljstava. To je najsnažniji efekt ovog projekta kojeg ćemo, uvjeren sam, vidjeti za nekoliko godina – zaključio je dožupan Brodsko-Posavske županije Damir Mirković.

Učenici obnovljenih škola u TK postali su inovatori i naraštaji kojima je projekt "Inovativnim umom do pametnih škola" pokazao kako da sami kreiraju vedriju i mudriju budućnost. (Fena)

Date: 12-06-2019